

**Siunnersuut: Kalaallit Nunaanni sulitilluni ajoqusersinnaanermut isumannaarineq pillugu inatsisissamut siunnersuummut Inatsisartut aalajangiiffigisassaannut Naalakkersuisut oqaaseqaataat.**

(Inuussutissarsiornermut Aatsitassanullu Naalakkersuisoq)

**Tunngavilersuut**

Kalaallit Nunaanni sulitilluni ajoqusersinnaanermut isumannaarineq pillugu inatsisissamut siunnersuut saqqummiunneqarpoq sulitilluni ajoqusersinnaanermut isumannaarineq pillugu Kalaallit Nunaanni eqaannerusumik peqqussutitigut tunngavissaqalernissaq siunertaralugu. Siunnersuutikkut peqqussummi atuuttumi peqqussutit ingerlaannassapput ataasiakkaannguanik kalaallit atugaannut naleqqussaaffigineqaannarlutik. Peqqussut allannguisinnaanermut periarfissaliinngilaq taamaattumillu sulisilluni ajoqusersinnaanermut isumannaarineq pillugu inatsisissaliorneqartariaqarluni. Kalaallit Nunaanni sulitilluni ajoqusersinnaanermut isumannaarineq pillugu inatsit eqaatsumik peqqussutinik naleqqusnaanissamut periarfissiisaaq Danmarkini sulisilluni ajoqusersinnaanermut isumannaarineq pillugu inatsisip allanngorsinnaanera apeqqutaatinnagu. Sulitilluni ajoqusersinnaanermut isumannaarineq pillugu inatsit aamma kalaallit tungaanniit qallunaat inatsisaannik allaanerutitsinissamik kissaateqassagaluarpata taamaaliornissaamut periarfissiisussaavoq.

Manna tikillugu Kalaallit Nunaanni sulitilluni ajoqusersinnaanermut isumannaarineq ukiut ingerlaneranni qallunaat tassunga tunngatillugu inatsisaasa allanngortarneratigut piomasaaqatinik tunngaveqartarsimavoq. Piomasaaqatit malittarisassanut tunngaviginerat Kalaallit Nunaanni ineriartorneq tunngavigalugu piariaqartitssinermut malinnaanissamut eqaatsumik periarfissaliisarsimangilaq.

Kalaallit Nunaanni sulitilluni ajoqusersinnaanermut inatsit Sulitilluni Ajoqusersinnaanermut Aqutsisoqarfimmit Nuummiittumit ingerlanneqassammat tamanna Naalakkersuisut sulitilluni ajoqusersinnaanermut tunngasunik tigusiumallernissaata tungaanut naleqquttumik aaqqiigallarnerusaaq. Naalakkersuisut siunissami sulitilluni ajoqusersinnaanermut tunngasunik tigusinissaq kissaatigissappassuk taava sulitilluni ajoqusersinnaanermut isumannaarineq ingerlalluartoq naleqqussarsimasorlu tiguneqarsinnaajumaarpoq.

Inatsisissamut siunnersuummi Kalaallit Nunaanni sulitilluni ajoqusersinnaanermut isumannaarinermut tunngatillugu naleqquttumik aaqqissuussinissaq ullumikkut aaqqissuussinermut naleqquttoq siunnersuutigineqarpoq. Tamatuma saniatigut isumannaarineq taanna ilaanneeriarluni napparsimmavimmi namminersortumi passunneqarsinnaanermik periarfissiineqassaaq. Aalisartut piniartullu ukiumut akissarsiaat qaffanneqassaaq taammalilluni taakkua, ajoqusersimagunik sillimmasersimagunillu, ingerlaannartumik annertunerusumik aningaasaliiffigineqarsinnaalissallutik.

Inatsisissamut siunnersuut suliap ingerlanneqarnissaanut ajoqusernerullu akuerineqarnissaanut taarsiissutisiassallu angissusilerneqarnissaanut qallunaat sulitilluni ajoqusersinnaanermut isumannaarinermut inatsisaanni peqqussutit assingannik periarfissiisaaq. Taamaalilluni sulitilluni ajoqusersinnaanermut isumannaarinermut

tunngatillugu inatsit malillugu suleriaaseq Kalaallit Nunaanni pineqartuni sulitilluni ajoqusertoqarsimatillugu atorneqarsinnaalissalluni.

Inatsisissamut siunnersuutittaaq siunnersuutigaa ingerlatsinermut akisussaaffik Kalaallit Nunaanni Arbedsskadestyrelsemiissasoq Suliassaqartitsinermut ministeqarfik akisussaaffimmik tigumminnuulluni.  
Imaappoq sulisut Kalaallit Nunaanni sulitilluni ajoqusersinnaanermut isumannaarinermik tunngatillugu Sullissivimmi massakut aqqissuussinermik ingerlataqartut atorfeqarnerat Arbejdsskadestyrelsemi nuunneqassaaq.

Matumuuna siunnersuut Inatsisartuni suliarisassanngorlugu tunniunneqarpoq.